



PAMFLET

212






Copey aines schreibens
 der Ritterschafft/Edlen/vnnd Stett/in
 Holland/in namen vnnd von wegen der
 Stende derselben Landtschafft/ An die
 Herren / welche das ampt aller Stend
 der Niderland tragen: Sie darinnen
 bermanent/das sie ainhelliglich (der Kö-
 niglichen May. von Spannen zu gu-
 tem) dieselbige Land/auf des Hertzogen
 von Alba / vnnd seiner Spanniart ge-
 walt vnnd Tirannei/widerumb zu
 ihrer alten Volfart vnd Frei-
 heit helffen bringen.



Psalm. 10.

HERR/ warumb trittestu so ferne? Verbirgest dich zur zeit
 der not? Weil der Gottlose vbermut treibet/mus der Elende leiz-
 den/Sie hengen sich an einander/vnd erdencken böse ruck/16.

M. D. LXXIII.



212
20

Der 52. Psalm.

Was trokhestu denn du Tyrann/das du kanst schaden thun/So
doch Gottes Güte noch teglich wehret.

Seine zunge trachtet nach schaden/Vnd schneit mit lügen/wie ein
scharpff Schermesser.

Du redest lieber böses denn gutes/Vnd falsch denn recht/Sela.

Du redest gern alles was zu verderben dienet/Mit falscher zungē.

Darumb wird dich Gott auch ganz vnnd gar zerstören/vnnd zers
schlagen/Vnnd auß der Hütten reißen/vnd auß dem Lande der Lebena
digen außrotten/Sela.

Vnd die Gerechten werdens sehen/vnd sich fürchten/Vnd werden
sein lachen.

Sihe/Das ist der Man/der Gott nicht für seinen trost hielt/Sona
der verließ sich auff seinen grossen reichthumb/vnnd war mechtig schas
den zu thun.

Ich aber werde bleiben/wie ein grüner Olbaum im hause Gottes/
Verlasse mich auff Gottes güte immer vnd ewiglich.

Ich dancke dir ewiglich/denn du kansts wol machen/vnd wil hars
ren auff deinen Namen/Denn deine Heiligen haben freude dran.



Volgeborne/Edle/
 Gestrenge/Hochgelerte/Für-
 sichtige/Ersame vnnnd Weise/Liebe
 Herren/Freund vnnnd Mittbrüder/2c. Demnach
 wir in erfahrung gebracht haben/ Das der Herkog
 von Alba abermalen alle Stende diser Niderland
 in gemain(vmb von denselben geldt vñ andere Not-
 turfft/ zuvolsführung dieses gegenwertigen Kriegs
 zubegeren) zusamen beruffen hat.

So können wir auß schuldiger pflicht/ darmit
 wir vnserm gemeinen Vaterlandt verbunden sind/
 Ewer Liebden mit gegenwertigem Brieff zuersuch-
 en nit vmbgehen/ Vngezweifelter guter zuuersicht/
 es werde E. L. solchen vnsern bericht/vnnnd getrewen
 rathe(welche wir auß teglicher erfahrung mit grund
 fürbringen) zuuernemen vnnnd anzuhören/ keines
 wegs zuwider sein. Dañ ob wol wir durch wider-
 wertigkeit der zeit/ vñ sonderlich durch verbitterden
 haß/mißgunst vñ widerwillen/ etlicher einer fremb-
 den Nation/ ietzo von einander abgesondert / vnnnd
 durch derselben böse/listige/ vnnnd falsche Practicen/
 wider vnsern willen / in gegenwertigen Krieg vnnnd
 vnruhe

vnruhe geraten sind: So verhoffen wir doch vnge-
zweiffelt/das E.L. auß angeborner liebe vnd natür-
licher verwandtnuß her des Vatterlandts/nimmer-
mehr in vergessenheit stellen werden können / Der
gutwilligkeit/freundschaft/auch herzlichem trewe/
die wir vor dieser zeit je vnd allwegen gegen einan-
der getragen/vnd auch mit den wercken geleistet ha-
ben / wie wir dann solches vor Gott vnd aller Welt
zuthun schuldig gewesen / Vnd wir vnser thails ge-
gen euch noch mit allem guten willen ganz bereit
vnd wol genait sind. Souil destomehr tragen
wir dises gut vertrauen zu euch / ir werdet diese vn-
sere trewherzige ermanung/one allen verdruß oder
widerwillen von vns auffnehmen vnd verstehen/
vnd mit aller billigkeit vnd warheit erwegen vnd be-
dencken/das (wie es dann im grund also ist) wir kei-
nen krieg gegen einander führen/dieweil wir des kein
vrsach haben / vnd keiner niemaln/so in kleinem als
in grossem gegen dem andern etwas mißhandlet
oder gethan hat / Sondern aller diser zwitterag vnd
Krieg/allein wider die jekz Regierende frembde Na-
tion sich erholt/welche wir allesampt fur dieser zeit
(als diesen algemeinen Landen zum höchsten sched-
lich vnd verderblich) einhellig abgehalten/vnd kei-
nes wegs geduldet haben. Nun ist es je war/vnd
gnugsam vor augen / das diese jekige frembde Re-
genten

genten / im falschen fürgeben vnd erdichtem schein/
mit welchem sie den namen der Königlichen May.
vnseres Gnedigsten Herren/ vnnnd der Religion / zu
irem fürnemen höchlich mißbrauchen/ E. L. wider
vns so fern auffgebracht haben / das sie ewer geldt
vnd gut/ Ja ewere leib vnnnd leben/ zu vnserer vertil-
gung vnd genßlicher verderbung gebrauchen/ vnnnd
sich dadurch Herrn vnd Regenten/ nicht allein vber
vns/ sondern auch vber euch vnnnd alle ewere Erben
vnnnd nachkommen inn ewige zeit zu machen/ vnter-
stehen.

Man liest in der Römer Historien/ das/ da das
Volck zu Rom inn der Stadt durch einen schweren
streit zertheilt war / vnd der Adel gegen dem gemei-
nen Volck so gespannen stunden / das der eine theil
außer der Stadt auff einen Berg gewichen war/
vnd lieber den gemeinen feind einfallen lassen/ denn
das sie fortan mit einander einig gemeinschaft ha-
ben wolten / Da habe inen Menenius Agrippa ein
solches Exempel fürgehalten: Das auff ein zeit die
Glieder des Menschlichen leibs inn einen mißuer-
stand vnd harten streit gegen einander kommen wa-
ren/ Also das die hende vnd füß / desgleichen alle an-
dere eusserliche glieder beschlossen vnd resoluirt hat-
ten / den leidigen Bauch mit schwerer saurer arbeit
nit mehr lenger zuspiesen / dardurch dann geschehe
vnd er-

vnd eruolgte / das da der Bauch kein narung mehr
bekame vnd ganz krafftloß worden / das auch der
ganze Leib geschwecht was / Also das weder hend
noch füß kein arbeit mehr thun kundten / sind sie auß
not gezwungen worden / sich sambelich widerumb on
tereinander zuuersönen / damit wann sie alle zusa
men einig / der ganze Leichnam zugleich wie hieuor /
widerumb gespeist im leben vnderhalten köndte wer
den. Da nun diß gleichnus vom Römischen volck
gehört wurde / haben sie sich also bald one weitem
rath vereiniget / Vnd als sie mit dem Adel versönet /
sind sie widerumb in die Statt kommen / vnd haben
einhelliglich vnd zugleich die waffen wider iren all
gemeinen Feind in die Hend genommen / vnd ine nit
allein auß iren gränzen vertrieben / sonder auch ir
Statt mit derzeit zu solcher hoheit / macht / vñ auff
nemen gebracht / darinnen sie nicht wenige hundere
jar / für alle andere Stett / gegrünet haben. So
dann geliebte Mittbrüder / diß Volck von Rom gu
ten sug vnd recht gehabt / vnd ist inen wol ergangen /
dß sie durch diß exempel vom Menenio Agrippa sich
sambelich inn ein starcke verbundtnus vereiniget /
Wieuil mehr befügte vrsachen haben wir / vns ein
helliglich mit einander zuuerbinden / vnd einander
(wider vnser allgemaine feind vnd veruolger) mit
allem gewalt die hend zureichen / inen widerstan
den / die

den/dieselbige auch genzlich auß vnsern Landen ver-
treiben/vnd die Land widerumb in ire alte flor/frei-
heit/wol fart/vnd alten Stand(darinnen sie zuuor
inn zeit vnserer eintrectigkeit/ so lange Jar gewesen
sind)bringen

Dann wir haben je keiner dem andern leids ge-
than / vnnnd tragen noch (Gott lob) keinen billichen
haß noch feindschafft gegen einander/darumbn wir
vns von einandern solten oder wolten scheiden oder
absondern / wie die von Rom gethan haben. Vnd
sind im grund vnnnd in der warheit dieser auffruhr/
empörung/vnd gefasten waffen/allein vnd die eini-
ge vrsächer die Spanniart/ so sich in diesen Landen
befindē / Die/welche(wiewol deren vil/ja der mehr-
rer theil eines geringen vnd schlechten herkommens
sind) sich so obermässig erheben/vnd mit dem Reich-
tumb diser Lande/so gros vnd brechtig machen/das
sie auch allbereit mit irem hoffertigen vnnnd stolzen
mutwillen/vns alle in armut zubringen/vnnnd ires
gefallens mit Blutdurst ober vns zuherrschen sich
vndersteen/ Ja alle vnser e Güter / vnd den schwaiß
vnser angeichts / mit allem dem das vnser Vor-
eltere vnnnd wir/mit bitterer saurer arbeit hertiglich
bekömen/zu irem wollust / pracht vnd vnnützlichem
verschwenden/mißbrauchen/ Ja vns vnser e weiber
vnd kinder / vñ alles was wir von Gott dem Herrn
liebs

liebs vnd werths in dieser Welt haben / inen leib el-
gen / vnd vns zu Sclauen vnnnd vnwiderbringliche
dienstbarkeit / vnterwirffig zumachen / inn vollem
werck seind.

Vnd das noch am maisten vnd zum aller höch-
sten beschwerlich ist / wollen sie auch vnserer Seelen
vnd gewissens / rechenschaft von vns haben / vnnnd
auch nach irem gutduncken darüber herrschen / Da
doch schwerlich ainer vnter ihnen allen waißt / ob
auch ein Gott im Himmel ist / vnnnd auch jemallen ein
einig wort von dem Sone Gottes Jesu Christo vn-
serm ainigen seligmacher gehört noch gelesen hat /
wollen also vnsern Glauben vnd Religion ires ge-
fallens maistern / vnd vnter disem Deckmantel vns
vnter ir inquisition tringen / die doch allain wider die
getauffte Juden vnd verlaugnete Christen in Spa-
nien angericht ist / vnd gebraucht wirdet / etc. vnd mit
vñ vnter disem schein sie doch nichts anders suchen /
dann vns von allen vnsern Priuilegien / Freyhei-
ten / vnd alten herkommen (die vnser Voreltere mit
irer arbeit / fleiß / vnnnd getrewem dienst / ja mit irem
gut vnd blut erworben / vnnnd hinter inen verlassen
haben) zuuerstossen / vnd vns derselben zuberauben.

Das wir aber solches nit leiden noch gedulden
finden / sondern es vil lieber biß auff den letzten man
wagen vnnnd setzen / ehe vnnnd wir von vnserer alten
Regierung /

Regierung/vnter vnserm Allergenedigsten Herren
dem König von Spanien / vnserm rechten vnn
natürlichen Grauen von Holland/der vns die vor
bemelte Priuilegia/freiheiten/vnd alte herkommen
ganz würdiglich geschworen hat/abstehen wollen/
So vnterstehet sich der Herkog von Alba mit sei
nem anhang/euch zu bereden/das wir vns gegen vñ
wider vnsern König auffgeworffen haben/vnd euch
dahin zuweisen vnn and zureißen / das ihr euch von
vns ewern natürlichen vnd gebornen Landsleuten
vnd mitbrüdern abscheiden / vnn euch zu Dienern
ires grossen mutwillens / vnd eussersten Executorn
vnd Nachrichtern irer rachgirigkeit vnd vorstehen
der irer unbefügten vorhaben / zugebrauchen.

Derowegen vnd darumb geliebte mitbrüder/
so wöllet doch vmb Gottes willen die sachen mit
gankem ernst erwegen / vnn euch zuuor wol beden
cken / ehe vnn jr euch noch tieffer vnter sein Tiran
nen begeben / oder im das jenige / so er euch in künfftig
er versamlung fürhalten / vnn an euch begeren
würdet/bewilligend. Laßt euch doch mit seinen gla
ten vnd heelen Worten nicht fahen / vnn mit seinen
verborgnen listen nicht plenden / noch den verstand
vnd vernunft nit so gar benemen. Ir seit die Stend
diser Land / das ist / Vorsteer vnn Beschirmer irer
Freiheit vnd Priuilegien / welche jr auch vor Gott
vnd

vnd der Welt / vnd bey vermeidung des Malignids /
zubeschützen vnd zuhandhaben / schuldig seit / dann
ir habt solches zuthon den Landen gelobt vnd ge-
schworen. Wie ir auch darumben auß allen Stet-
ten Deputiert vnd erwehlet seid worden / damit ain
ieder sein Statt / vnd ir all sampelich vnd mit ein-
ander dem ganken Land helffet vorstehen / vnd gegen
allen den ienigen / die inen laids thon / oder vbelß zu-
fügen wolten / zubeschützen vnd zuuertheidigen.

Darumben hat auch vnser Genedigster Herr
der König / als ain Hertzog von Brabant vñ Gel-
dern / Graue von Flandern / Holland / Seeland /
Hennegaw / Arthons / etc. mit aller Reuerenz zu
Gott dem Almechtigen geschworen / das er vns bey
allen vnsern Priuilegien / Freyheiten / Rechten / vñ
herkommen / vnuermindert vnd vnuerkert bleiben
wölle lassen / vnd dieselbigen in allen iren Puncten
vnterhalten.

Auff solche zusagen vnd versprechen / habt ir ine
im namen der Stette vnd der ganken Gemainde / zu
vnserm natürlichen Herrn / vnd genedigsten beschir-
mer vñ Vorsteher angenommen / Also das ir ewers
Volcks / so wol als auch der König selbs / nit mecht-
ig seit / Vñ im fall / dz der König (deß wir vns doch
kaines wegs versehen) wider seinen Eid thon / vnd
wider vnser geschworne Priuilegia was fürnemen
wolte /

wolte/so entlieffe er euch selber / vnd ainen jeden be-
sonder/seiner Pflicht vnnnd schuldigen dienst / vnnnd
würden mit ainem mal für allwegen ipso facto mit
der that/cassiert vñ zu nichten gemacht/alle Obrig-
keiten vnd Ampileut/welche den selben Priuilegien
zu wider oder zu nachtheil (in was gestalt das auch
geschehe)eingesezt oder angenommen werden.

Wie soltet jr dann nun zusehen können/das ain
Hörzog von Alba / oder ain anderer Spanniart/
der von vnser natürlichen Herrn geblüt/noch her-
kommen nit ist/noch mit disen Landen kain gemein-
schafft haben kan/sich vnterfangen wolte/ nicht al-
lein alle Landrecht/Priuilegien / vnnnd Freyheiten/
nach seinem mutwillen zu nichten zumachen/Son-
dern ewer Namen vnd Authoritet(die doch vor zei-
ten bey allen vnsern Fürsten vnd natürlichen Her-
ren/den Hörzogen von Burgund vnd Braband/
Grauen von Flandern vnnnd Holland / inn grossen
ehren vnd Reputation gehalten sind worden)zu sei-
ner vnnenschlichen Tirannei vnnnd mutwillen zu-
missbrauchen.

Die hochlöbliche Vorsahren der Königlichen
Maie. vnser aller Gnedigsten Herren / haben
ohne der Stend Rath vnnnd ansinnen nie kain
Krieg geführt / noch Friden gemacht / ja auch kain
Münk geschlagen / noch auß ihnen selbs dem Volck
oder

oder Vnterthonen kein Steuer auffgelegt / ja one
irer/der Stende / wissen vnd verwilligung nichts
gethon/ vnd haben solchem allem nachzukommen
selber geschworen / Welches auch von Kayser Ca-
rolo/ hochlößlichster gedechtnuß/ vnd vnserm jetzi-
gen König selber/ mit irer Maie. Aid in ewere hend
also beuestiget/ vnd mit der that auch sehr fleißig vn-
terhalten worden ist.

Nun sehen aber E. L. das diser frembde Tyrann/
der euch weder wenig noch vil angehet / Euch vnd
ewerm Volck solchen oberlast/ steuren / vnd ober-
trag von Krieg vnd Kriegsleuten zu aller Tiran-
ney vnd vntertruckung / nach seinem lust / willen/
vnd seines gefallens/ auff den halß legen will/ Wie
werdet ir solches gegen Gott vnd redlichen Leuten/
(so ir solchem zusehet) verantworten können?

Vnd were wol großlich zuuerwundern / vnd
höchlich zubeflagen/ das vnter euch allen/ vnd im
ganzen Land/ vnter so vil Herren vñ großem Adel/
die von so ehlichen Stammen herkommen vnd ge-
boren sind / doch nicht ainer allein sein solte/ der ain
Männlich hertz im leib hette/ vñ dises Spanischen
Tirannen/ obermut vnd frechheit nicht solte dörfen
widerstand thun / Vnd das ir alle zumal Knecht/
vnd gleich seine Leibaigne sein soltet/ die anderst
nichts dann was ime gleich wol gefellig vnd ange-
nem/

one
hts
nen
Ca-
zi-
end
on-

in/
und
er-
an-
en/
Die
en/

und
im
el/
ge-
in
en
fen
ht/
rft
ge-
m/

nem/sagen oder reden dörfen / Sonderlich die weil
er durch sein vbermessigen stolz vnnnd obermut / die
Wolgeborne/Edle/ vnd Hochlöbliche Herren von
Egmont vnd Horn / vmbgebracht / vnnnd das Edle
blut (welches sie inn des Königs vnd Vatterlands
diensten/zu betwarung irer vnd ewer aller wolfsart/
alle zeit williglich vnd miltiglich gegen den Feinden
gewagt haben) also jämmerlich vergossen / vnd sich
nit geschämbt hat/vor ewern Augen/vnnnd inn ewer
gegenwertigkeit / mit seinem blutdurstigen schwert/
solches zusauffen/vnnnd von ainer Brucken stürzen
zulassen/vnd auch so vil vnschuldiger vnd frommer
Leut blut / von so manigem des besten Adels im
Land/vnd so fürnemen vnd treffenlichen Burgern
vnd Inwonern allerley Stands vnd qualitet/zu-
uergiessen.

Vnd vber solches/auch die andere fromme vnd
Edle Fürsten/Grauen/Herrn/Edelleut vnd Bur-
ger/in vnzalbarlicher menge/auß dem Land vertri-
ben vnd versagt hat/Allain deßhalben vnd darun-
men/das sie/gleich wie wir/vnd auch ir / ime wider-
sprochen haben/vñ gesinnet gewesen/dise Land von
der Spannischen Inquisition zubefreyen / vnnnd inn
iren alten gerechtigkeiten / löblichen Priuilegien/
vnd gebreuchen (zu ehre vnd dienst der Königlichen
Majc. vnser aller genedigsten Herrn) zuerhalten.
Vnd

Vnd ob wol durch solchen gewalt vnd grausam-
heit der Inquisition, der Hertzog von Alba verhofft
hat/solche forcht vnd schrecken vnter alle menschen
zumachen/ damit er fortan seines lusts vnd gefal-
lens allein mit den seinen regieren / vnd alle sachen/
vnd den ganzen Stand diser Land/ zu seinem mai-
sten nutz vnd wolgefallen anrichten vnnnd verkeren
kündte.

So versehen wir vns dannoch nit/das die her-
ren vnnnd gemüter/von all den noch vbergeplibnen/
also gar eingenommen vnd verkert seyen/vnd kaine
Herrn/Edle / Oberkatten / oder Burgere (die auß
natürlicher angeborner liebe des Vatterlands/
dasselbige / vnd die Innwohner / vor solcher Räthe
vorhaben vnd Regierung/sonderlich wie dasselbige
diser zeit bey vns allberait mit allem gewalt im
gang ist / zuretten vnd zubeschirmen) sich befinden
vnd erzaigen solten.

Liebe Herren / ir secht wie dise klaine Prouinz
von Holland sich erhelt/ vnnnd wie Gott der HErr/
(welchem wir lob vnd danck in ewigkeit darumben
sagen) wider das wüten vnd toben des Tyrannen/
(der vns alle mit ainander gern inn ainem augen-
blick / wo er nun kündte/ außrotten vnnnd zunichten
machen wolte) biß anhero so wunderbarlich bewa-
ret vnd beschützet hat/ vnnnd mit seinen gnaden noch
erhalten

erhalten thut / Ob schon der Horkog von Alba/
samt allen seinen Spanniarten vnd Italianern/
(welche doch in der warheit nicht so fast zu fürchten
sind / als grausam sie sich ober die überwundene vñ
benötigte erzaigen) alle seine macht vnd gewalt auff
Holland gewendet hat.

Vnd da die von Amsterdam / welche der einne-
mung Spanischen Kriegsvolcks / sich allezeit ge-
gen dem Horkogen von Alba (gleichwol mit ab-
kauffung einer namhaften summa gelts) gewai-
gert / der beschweriß der Steuer des zehenden pfen-
nings / sich am meisten beklagt / auch wider die exe-
cution mit der that sich entgegen gestellt / vnd in irem
fürnehmen (darzu sie die andern Stende auch bewegt
haben) bestendig gebliben weren / vnd mit einlassung
der Feind in ir Vatterland sich nit verführen hetten
lassen / sondern getrewe hilff vñnd beystand gethon /
Warlich der Horkog von Alba würde Holland
mit seinem Kriegsvolck anzufallen vñ zubesuchen /
wol gescheucht vnd sich anderst bedacht haben.

Hetten auch gleichermassen die von Mittelburg
bißhero sich nit lassen betriegen / vñnd mit falschem
fürgeben / vom Horkogen vñnd seinem anhang / nit
in das Net bringen lassen / er solte gewißlich von al-
len seinen Spanniarten / nit ainen auß dem Land
Walckhern lebendig gebracht haben.

Weren

Werren auch etliche Gubernatores / Herren/
Edle vnd Vnedle/ bey irem vorhaben vnd zusagen/
Dessen sie sich vor dem gemainen Mann öffentlich
hören vnd vernemen haben lassen (vmb andere auch
des Hörhogen Regiment zum widerstand vff zu-
bringen) bestendiglich verharret / Es würde gewiß-
lich vnnnd fürwar dem Hörhogen sein böses fürne-
men vñ hochmut / in vil weg verkürzet sein worden.

Dann wo her vnd von wannen hat doch er von
Alba / all sein macht vnd gewalt / darauff er sich so
ganz trutzig verlaßt / anderst als von euch / vnd von
den Stetten diser Niderlande Von wannen hat er
alle notturfft von Schiffen / vnd der selben zugehö-
rige rüstungen von wannen das Gelt vñ Wassen/
ja von wannen kommen ime so vil grosser hauffen
Kriegsvolcks / dann eben auß den Niderlanden
selbere

Ist das nit wol zubeflagen / vnd billich zuerbar-
men / das diß arme Land mit seinem aigen gut vnd
blut / alnem frembden Tyrannen beyfelt / vnd dar-
durch inn ain schendliche / ewige Seruitet vnnnd
Dienstbarkeit / von frembden Nationen gebracht
würdet / Ja seine aigene Landsassen vnd Inwohner
ermordet / vnd außtilget

Wie ist doch das arme Niderland so sehr auß
seiner art verkert vnnnd Bastardiert worden / wo ist
das Edle

das Edle gemüt vnserer Vorfahren hinkommen/
die niemaln kainer frembden Nation ainige Regie-
rung diser Land/ia auch kain Ampts oder Stands
verwaltung zulassen noch gestatten haben wölten/
welches sie auch mit allem fleiß/vnd sonderer mühe
vnd arbeit/stets/biß erst auff wenige Jar her/also
beharlich vnterhalten haben/Dann allezeit durch
einwirkung frembder Nationen inn die Regie-
rung / diser Lande vntergang vnd verderben/ sorg
getragen worden ist. Wie dann iezo (Gott vnserm
Herren seye es geklagt) klerlich erscheinet / Das
auß deß Hörhogen von Alba Regierung/ Feind-
schafft mit den vmbliegenden Königreichen/vnd an-
dern benachbarten Landen / verderbung der Hand-
thierung / vnd niderlag der Handwerker (darbey
dann dise Niderland vnd deren Reichthumb vor di-
sem bestehen bliben) eruolgt ist/ vnd lechlich durch
außiagung/ vertilgung vnd ermördung der Inn-
wohner (one ainiche betrachtung der wolfsart diser
Land / noch des Königs) die Handthierungen inn
frembde hand vnd Land getriben worden sind.

Dessen aber vnangesehen/liebe Mitbrüder/wöl-
len wir diß iezo fürüber gehen lassen/vnd euch mit
jetziger gelegenheit der sachen zuerkennen geben/wie
Gott der Herr sein hand ober vns helt / vnd vnsern
Feinden nit zum Raub / noch vor inen zuschanden
werden lest.

E Warumb

Warumb faßt ir dann nit auch ain Mannlich
herz/vnd starcken vnerschrocknen mut/vñ helfft mit
vns vnd zu gleicher hand diß vnrecht fertig vnd vn-
träglich Joch/von vnser aller helsen/ainest genzlich
vnd inn gemain abzuwerffen / Vnd bedencnt/das
alldieweil der Horkog von Alba (da wir gegen ain-
ander auffgestanden vnd empöret gewesen/vnd ime
der maiste thail diser Land beigestanden ist) so we-
nig außrichten hat finden/ Was er doch thon werde
mögen/wann wir vns ainhelliglich vnter dem wis-
sentlichen gehorsam der Königlichen Maie. vnser
gnedigsten Herrn/verhalten/vnd dise frembde herr-
schende Tyrannen vnd Regierer/ auß disen Landen
verjagen/vnd vnser alte Recht vñ Priuilegien mit
allem ernst/samplich beschirmen / vnd denselbigen
vorsehen thon. Vnd angesehen das er von Alba diß
flaine Ländle von Holland / mit ainem thail von
Seeland/in so langer zeit/vñ mit allem dem gewalt
den er auß Italia/Spannia/Teutschland/Franck-
reich/vñ auß disen Niderlanden zusamen gesamlet
hat/nit vnter sich bringen finden / Wievil weniger
wird er verrichten mögen / wann Brabant / Flan-
dern / Geldern/Frießland/Oberwissel / Arthons/
Hennegaw/Lützenburg/vñ andere Prouincien der
Niderland / oder ain thail derselben / sich zu Hol-
land vnd Seeland begeben / vñd ime samplichen
widerstand theten. Fürwar

Fürwar wir zweifelen gar nicht/wir wolten der
gestalt(zuorderst mit Gottes gnedigem beystand)
der sachen bald ein end machen/ vnd vnser vertruck-
tes Vatterland/ widerumb in seinen alten Stand/
auffnemen vnd wolffart bringen. Dann wo irs
recht bedenkend/ vnd so ir ewer hilff zu ruck halten/
ja wann ir auch nimmermehr ain schwert wider ine
außziehen wolten / was solte er auch außrichten
finden/ Demnach es offenbar gnug ist/ das alle sei-
ne sachen anderst nichts sind / dann ain außwendig-
ger / eiteler vnd hoffertiger glantz / darmit er sich
fürchten macht/ vnd mit falschen erdichten Practi-
cen/ ja mit subtilitet seiner Instrument vnd Mit-
helffer / die sachen so weit bringt / das er eweren ge-
walt inn seine hände bekombt / mit welchem er als
dann seinen mutwillen vnd Tyrannen/ auch wi-
der ewern willen (vnd wie wir nicht zweiffeln) wi-
der beuelch vnd mainung vnser Königs / vol-
bringt.

Ir werdtis ja noch in frischer gedechtnuß haben/
welcher gestalt er im vershienen Monat Augusti/
inn der zusammen kunfft aller Stende / euch allen
samptlich fürgehalten hat / wie das die Königliche
Maie. auß Spannia/ zu der letzten vnd eussersten
hilff/ zehenmal hundert tausent gulden / ihme zuge-
macht habe / vnd das er also bald 32. Regiment
Teutscher

Teutscher Knecht/ 50. Fendlen Spanniart/ 150.
Fendlen Balonen vnd Niderlender/ vnd vber sol-
ches noch 10. tausent Teutsche Reuter/ vnnnd 3000.
Pferdt von den Benden / vnnnd dann 2000. leichte
Pferdt / vnnnd auch ainen grossen hauffen Kriegs-
schiff/ one die ordenliche besatzungen zusamen brin-
gen wolte. Sich selber stolzlich vermessende/ vnnnd
euch auch zusagende / alle seine Feind innerhalb 6.
Wochen / oder doch zum aller lengsten inn zwaien
Monaten/ auß allen disen Niderlanden vertreiben
wolte/ Allain an euch begerende nachdencken zuha-
ben/ wie das gelt (solches Kriegsuolck darmit zube-
zalen) auffzubringen sene/ auff das es euch nit auff
dem halß ligen bleibe / vñ das ganze Land in grund
außessen vnd verzerten.

Darauff dann der Duca de Medina Coely, so zu
seiner lincken hand saß / euch auch zugesagt/ das er
für sein person nit nachlassen/ sondern dem Hörhog-
gen von Alba/ mit leib vnd gut/ biß auff das eusser-
ste beystehen wolte / damit das jenig / was euch zu-
gesagt worden/ gehalten werde.

Nun lassen wir aber euch selbs Richter sein/ ob
auch der Hörhog von Alba solches im minsten vol-
bracht habe. Wir lassen geschehen / das er ain solche
anzal Kriegsuolck bey weitem nie habe zusamen
bringen finden/ vnd ir aber öffentlich secht / das nit
allein

allein die sechs wochen/sondern auch die zwen Mo-
nat fürüber sind / ja das allberait das zwatet Jar
verhanden/vnd er eben so weit von seiner rechnung/
als er anfangs gewesen ist.

Auß welchem man gründlich vnd wol abnemen
kan/das er anderst nichts sucht / dann mit einem
falschen fürgeben vnnnd listigem bereden / euch das
gelt abzutragen/ vnd den Krieg also in die harr zu-
uerlengern.

Vnd doch gleichwoln / dem König hiezzwischen
die sachen vil anderst / als sie an inen selbs sind / zu-
uerstehen/vnnnd irer Maie. vrsach gibt/solchen sehr
schedlichen Krieg/wider seine eigene Vnterthonen/
one alle not / mit grossem vnnnd schwerem kosten zu-
führen.

Wiewol es fundtbar genug ist/das er das gelt/
welches er empfacht vnnnd zu seinen handen bringt/
kaines wegs inn bezalung seines Kriegsvolcks
braucht noch anlegt/In ansehung dz er den Span-
niarten ober die acht vnd zwainzig / vnd den Teut-
schen Knechten ober die dreyßehen vnnnd vierßehen
Monat besoldung schuldig vnd hinderstellig gebl-
ben ist / Vnd er nit gar vergebentlich vnnnd omb sonst
den Stenden fürgetragen hat/das er ober die obge-
melte zehen hundert tausent gulden / fortan kaines
gelts mehr vom König auß Spannia zugewarten
habe.

Demnach

Demnach vnnnd dieweil er nun sekunder sieht/
das ime aller trost vnd hilff von andern orten man-
gelt / so nimpt er sein eusserste zuflucht zu Ewern
Liebden / die er eben darumben zusamen hat machen
versamen / vnnnd euch ober alle vnzalbare vnnnd vn-
trägliche vnkosten (darmit er dise Land biß anhero
beschwerdt / vnd biß auff die Bain / ja biß auff das
Marck der gebain außgesogen hat) noch mit zwain-
zig mal hundert tausent gulden iärlich zobelästi-
gen.

Aber liebe Mitbrüder / secht wol zu / vnd betrach-
tend mit guter fürsichtigkeit / was euch zuthon sene /
vnd gedendt nun nit anderst / dann das die Könige-
lich Maie. vñ Rath von Spanien / oder zum min-
sten irer Maie. Erben vnd Nachkommen / mit vnnnd
zu seiner zeit / diser ganken sach warhafften bericht /
vnd gute rechnung erfordern / vnd sich nit allein mit
den geplendien vnd falschen anzaigen / die sie bißher
von dem Hörtogen von Alba vnnnd seinem anhang
gehabt haben / ersettigen vñ beniegen lassen werden.

Vnd so sich als dann inn der warheit befinden
wirdet / das durch disen Krieg / vnd allein auß aige-
nem / des Hörtogen von Alba mutwillen (ober den
mercklichen grossen vnkosten / welcher mit deß Kün-
igs vnnnd diser Lande verlag / vngezweifelt ob den
zwainzig Million anlaufft) dise Land noch inn sol-
chen vn-

chen vnwiderbringlichen schaden vnnnd verlust / an
Volk / Stetten / Dörffern / vnd Flecken (irer Maie.
zugehörig) gebracht worden sind / So habt ir ja gar
nit zu zweifeln / das solches der Küniglichen Maie.
zu höchsten vngnaden vnnnd beschwernuß gelangen
wird / auch zweifels one / ir Maie. disen grossen scha-
den vnd verderbnuß seiner Erblande / sich an denen /
so zu solchem hilff vnd beystand gethon / vnnnd disem
obel zugesehen haben / widerumb erholen wollen.
So ihr dann hierüber noch fortsaren / vnnnd disem
Spannischen Tyrannen / wider ewer aigen Vater-
land vnd Landsassen / mit Gelt vnd andern derglei-
chen mitlen hilff vnd beystand laisten würden / So
muß auß disen dreyen notwendig das aine eruol-
gen / das aintweder diser jämmerliche Krieg noch
ain zeitlang sich erstrecken / oder aber Gott der Herr
vns die oberhand ober vnser Feind verleihen wird /
oder aber sie lezlich die Victory ober vns alle be-
kommen werden.

Nun ist es gewiß / das inn allen disen dreyen
Puncten / das endliche vnnnd ganze verderben diser
Lande / auß not vor augen stehet.

Dann erstlich / im fall das diser Krieg noch ein
zeitlang also verharren thut / So müst ir bedencen /
das in wehrung dises grimmigen Kriegs / die ganze
Narung genßlichen vergehet / alle Handhierung
darnider

darnider ligt / vnnnd die Handwercker auffhören/
Dardurch als dann dise ganze Land also erarmen
vnd verderben werden/ das one zweiffel grosse hun-
gers not/ vnnnd vnerschwingliche theurung darauff
eruolgen muß/ Auß welchem dann anderst nichts
als auffrühren/empörungen/ schwere krankheiten
vnd Pestilenz/ zu endlicher verwüstung diser Lan-
de/ zugewarten ist.

Vnnnd werden hiezwischen auch Holland vnnnd
Seeland / sampt allen umbligenden Landen / vom
Kriegsvolck außgezört vnnnd inn grund verderbt/
Dardurch Brabant noch Flandern / weder But-
ter noch Kees / noch andere gewonliche Prouiant/
auch kein Saltz mehr bekommen werden finden.
Welche gemelte Land/wan sie ires thails von Reit-
ter vnd Knechten außgezört sind/in eussersten jam-
mer vnd elend/ notwendiglich fallen müssen.

Vnd vber solches wir vns auch allerley plün-
derung vnnnd beraubung / ja auch abprännung der
Stett/Dörffer/vnd Flecken(irer Maie.zugehörig)
zubefahren haben / dieweil diser inheimische Krieg
solches alles mit sich bringt.

Vnd das noch das aller ergste / ist größlich zu-
besorgen/das in wehrendem disem Krieg/die Deich
durch Wasserstram vnd Vngewitter/inn Seeland
oder Holland/einbrechen möchten / oder aber solche
von

von ainem der baider thail auß verzweifelung (da
mit kain thail in seiner Feinde händ komme) durch-
gestossen werden / Welches alles (neben dem jäm-
merlichen tod fouiler tausent tausent menschen vnd
Vieh) nichts anders dann ainen ewigen vnd vntwi-
derbringlichen vntergang der selben Lande / zu nach-
thail vnd schaden der Königlichen Maie. vnd allen
derselben nachkommen / mit sich bringen kan.

Zum andern / so vnd wann wir (durch Gottes
willen) die oberhand vnd Victoriā vber vnser
Feind bekommen solten / So würde doch dasselbig
one jämmerlichen mord / vnd vertilgung ainer vn-
zalbaren summa der guten Inntwohner diser Lan-
de / derer sich der Hertzog von Alba zu seinen dien-
sten gebraucht / nicht geschehen finden. Dann man
dessen wol gewiß ist / so lang diser Tyrann Gelt vnd
Volck bekommen kan / das er vns nit aussitzen / son-
dern vns ganz vnd gar außzurotten / alle mögliche
mittel suchen wird / vnder also one groß blut ver-
giessen nimmermehr vntergetruckt wirdt finden
werden.

Vnd dann zum dritten / Im fall das aber er vn-
ser mechtig würde (welches Got der Herr durch sein
Barmhertzigkeit verhüten wölle) so habt ir nichts
gewissers / dann ain ewige vnd schandliche Dienst-
barkeit zu erwarten. Inn bedenkung / das er euch
D alle

alle samptlich / vnd alle Stett (von wegen walgerung des zehenden pfennings) für Rebell vnd widerspenilige halten wird/ Besorab die weil er jeko vnd allbereit (d̄z eben auß der selben vrsach her / diser jetzige letzte Krieg entsprungen sene) fürwenden thut/ vnd wird euch nit besser/ als ob jr euch öffentlich mit waffen vnd gewerter hand wider ine gesetzt hetten/ tractieren/ auch mit Schwert vnd Feswer/ nit weniger als vns/ verfolgen/ Wiewol wir vnser thalls/ (mit beystand Göttlicher hilff) der hoffnung sehen/ das er vns nit souil/ als er etwa vermainen mechte/ abgewinnen solle / Dann wir sind endlich vnd aigentlich dahin bedacht vnd entschlossen / vil ehe vnd lieber vns biß auff den letzten Mann zu wehren/ vnd zuwagen / dann das wir vns vnter aines solchen frembden/ vnd ganz obermütigen Tyrannen hand vnd gewalt ergeben wöllen.

Auß disem allem/ geliebte Mitbrüder/ nun klärlich erscheint/ gründlich vñ wol abzunemen ist/ das so vnd wañ jr ine zu disem Krieg/ noch lenger beystand/ hilff/ vnd fürschub mit gelt vnd anderm thon werden/ vnd ine in seinem fürnemen nit verhindert/ vnd öffentlichen widerstand thon helfft/ Das vnser armes vnd betrübt̄es Vaterland/ seinem eussersten verderben/ verwüsten/ vñ endlichem vntergang/ vñ möglichen vñ kaines wegs empfliehen wird finden.

Damit

Damit vnd aber dises Hörtogen von Alba ge-
müt/will/vnnd vorhaben (wie er mit des Königs/
vnser gnedigsten Herren Landen/vnnd vns/irer
Mae. Vnterthonen/zuhandlen gesinnet sene) desto
besser verstanden werde/ So nembt für euch/vnnd
beherziget mit allem fleiß/vnd wol/was er vns inn
seinem Perdon brieff/ mit außgetruckten/runden/
vnd klaren Worten trowet/Nemlichen/das/so vnd
wann wir vns vnter seinen gehorsam nit begeben/
wölle er diß ganze Land also vnnd dermassen ver-
wüsten vnnd verderben/das auch keine Reliquien
bleiben sollen/Vnnd was zu ainicher gedächtnuß
oder memori vbergeplibens sich hernacher befin-
den würde/das wölle er genzlich/ia mit der wurzel
außreiten lassen/ia diß Land (souer anderst was
daran oberigs bleiben werde) wölle er frembden
Nationen vntergeben vnd vnterwirffig machen/2c.

Hierauff fragen wir euch/wenn nun solches
geschehen solte (daruor vns der Allmechtige Gott
bewaren wölle) wer würde anderst dann ihr allein
die schuld haben/Als die ihr zu solchem verderbli-
chen mutwillen/dem genzlichen vntergang ewers
aignen Vatterlands/mit Gelt/mit Volck/mit
Schiffen/mit Munition/vnnd mit Prouiant/so
lange zeit hilff vnd beystand gethon habt/vnd noch
beystehen thut.

Wie

Wie werdet ir solches mit der zeit gegen der Küniglichen Maie. oder zum minsten gegen irer Maie. nachkommen verantworten oder vertheidigen finden / Oder vermaint ir / vnd das euch der Hertzog von Alba zu zeiten ain plat Papir / mit des Königs namen vnterschriben / fürzaigt vnd sehen lesst / darauff er / was ihme gelust vnnnd geliebt / schreiben mag / vnd euch zuuerstehen gibt / das die selben Brief erst also frischen auß Spannia kommen seyen / das ir damit des Königs oder seiner Nachkommen / billicher vngnad vñ rach entgehen werdet? Nain warlich / Dann ob ir schon des Königs Brief / mit seiner selbs aigenen hand vnterschriben / sehet / vnd das die selben von irer Maie. kommen seyen / genugsam vergwiset seit / Noch dannocht / dieweil euch wol bewust ist / das ir Maie. mit grund vnd warheit nit berichtet ist / vnnnd von gelegenheit gegenwertiger sachen diser Land anderst nicht waisst / dann wie ir Maie. vom Hertzogen von Alba / vnnnd seinen zugethonen bericht wird / So werdet ir in ewige zeit vnnnd nimmermehr verantworten finden / das ir des Königs beste Erbland / vnnnd seine getrewe Vnterthone / so jämmerlich verhören vnnnd zu grund gehen lasst / Dieweil ir als geschworne Stende der Land schuldig seit / die selbige inn getrewem beuelch zuhaben / Vnd den König selber (der euch die Land zubeschützen vnd

ken vnd beschirmen / vnd inn allen iren Prullegien
zu handhaben geschworen hat) der sachen gelegen-
heit mit besserem grund zuberichten / verpflicht seit.

Im fall aber ir solches nit thut / vnd der König-
lichen Maie. oder irer Maie. nachkommen / straff
zu entgehen vermainen möchten / So werdt ir aber
doch in der ewigkeit / die aller höchste straff deß All-
mechtigen Gottes / vnnnd Königs aller Königen /
warlich vnd gewißlich nit empfliehen mögen / Die-
weil Gott der Herr euch als beschützer vnd beschir-
mer ewers Vatterlands / gestellt vnd geordnet hat /
Welches euch nun auff füröhin vmb hilff vnd schutz
mit grossem seuffzen / vnd geschray alles volcks an-
ruffen thut. Dann ir seit / in abwesen deß Königs /
die jenigen / die irer Maie. ort vnnnd statt vertreten
sollend / vnnnd kein Gubernator oder Statthalter /
(one ewern willen vnnnd bewilligung) ainen solchen
Krieg zufüren vermag.

Vnd dieweil euch dann der König auch geschwo-
ren hat / das er keinen Krieg wider frembde (one
ewern consens) füren wölle / Wievil weniger solte
dann ain frembder vnnnd außländischer / der weder
dem König noch disen Landen / mit dem aller min-
sten nichts verwandt ist (vnter dem schein aines
Statthalters der Königlichen Maie.) ainen sol-
chen vberschedlichen Krieg / wider irer Maie. atgene
Vnterthonen /

Vnterthonen/zufüren/sich vnter stehen/vnd die sel-
bige mit fetwer/schwert/vnd hungers zwang (wie er
vns dann mit hellen klaren Worten trowet) nach
seinem stolzen hochmut vnnnd Tyrannischem mut-
willen/zuverderben/Vnnnd solches zuuolbringen/
so begert vnnnd erfordert er iezo von euch dise zwen
Million iärlich zuerlegen/Vnnnd stehen also die sa-
chen ietzt in ewern handen vnd willen / vnd so ir ime
hierinnen willfaren / vnnnd seine hochbrechtige wort
vnnnd betrawungen fürchten / werden ir vnzweifel-
lich in kurtzer zeit diß ganze Land inn ain ewige ser-
uitut/ia inn ein jämmerliche / vnd zuuor nie erhörte
verwüstung setzen vnd bringen.

Als dann wird man euch vor Gott vnnnd allen
Menschen anklagen vnd beschuldigen / als die jeni-
gen (so doch disen Landen vorstehen / vnd das arme
Volk beschützen vnnnd beschirmen solten) die disem
wütenden Tyrannen / zu seiner vnersetzlichen Ty-
rannen fort helfft / vnnnd ime zu allem dem jammer/
elend / vnnnd eussersten armut (darein vil Witwen
vnd Waisen / auch wolbetagte alte Väter / vnd ain
grosse anzahl vnschuldiger Kindlein gefürt werden)
beystand thut. Welche aber mit ihrem weheklagen
vnd heulen / gewißlich für Gottes Angesicht rach
vber euch schreyen / vnnnd auch alle verfluchungen
vnd vermaledeyungen von vns vnnnd ewern Nach-
kommen

Kommen vber euch eruolgen / ja zu ewigen zeiten die
vnseelige stund vnd tag verfluchen werden / darinn
nen diser Spannische Tyrann / seinen ersten fuß /
(vmb vns vnd sie alle zusamen inn ain solche jäm-
merliche vnd schendliche dienstbarkeit zubringen)
in dise Lande gesetzt hat.

Wollen geschweigen der vnehre / spott vnd schan-
de / die ihr bey frembden Königen / Fürsten / Poten-
taten / Stetten / ja aller Nationen Völkern auff
euch laden werdet / die ir ewer Autoritet vnd macht /
so euch Gott vnd das Landrecht gegeben hat / wider
disen Spannischen Tyrannen (zu beschirmung
vnd erhaltung ewers Vatterlands / vnd zu beschüt-
zung irer Freyheit vnd Priuilegien) mit den wer-
cken vnd der that niemaln erzaigen habt dörffen / ja
dieselbige im widerspil mißbraucht / vnd ewer aigen
Volck (welches ir inn seinen Landrechten / Freyhei-
ten vnd Priuilegien / beschützt vnnd beschirmet sol-
ten haben) vnter ain vnwiderbringliches Joch /
elenden jammer / vnd ewige Dienstbarkeit fürt vnd
bringt / Welches schwachen vnnd klainmütigen
Herkzen viel schwerer als der bitter todt selbs sein
wirdet.

So vnd wann ir aber disem Tyrannen sein vnbil-
liche förderung nit allein abschlagt / sonder auch die
sachen

sachen selber zu herken nembt/ vnnnd erweren Stand/
Namen/ Ampt/ vnd Autoritet/ nach erweren Aid vñ
schuldiger pflicht/ betrachtet / Ewer aigen Vatter-
land in seinen Rechten/ Freyheiten/ vñ Priuilegien
vorsehet / vnnnd an stat der zwen Million / die der
Hörkog von Alba (die Land zuerwüsten vnd zu-
uerderben) iärlichen begert / Ir nur ainen/ia ainen
halben Million für ain mal (das Vatterland zube-
waren/ vnd die frembden Tyrannen darauß zuuer-
treiben/ das Land widerumb inn guten friden vnnnd
ainigkeit/ vnd zu iren alten auffnehmen / vermögen/
vnnnd wol fart zubringen) anlegen wölt / Werdet ir
Gott dem Allmechtigen / der Königlichen Maie.
vnd erweren beengstigten Vatterland/ warlich (mit
ewiger vnnnd zeitlicher belohnung) hohen/ grossen/
angenehen vnd schuldigen dienst erzeigen vnnnd be-
weisen. Euch auch selber bey frembden Potentaten
vnd Herren/ia bey allen Völkern/ ainen löblichen
vnd herlichen Namen machen / Die ir als gute ge-
trewe Väter deß Vatterlands/ disen gegenwertigen
sammer vnd elend abgewendet / den Krieg gestillet/
den friden widerumb gebracht/ die gefallne narung
vnnnd handthierung auffgericht/ alle Handwerker
widerumb herein geholet/ den Reichthumb vnd alle
wol fart widerumb Procuriert habend / Mit diser
vngewisselten vergewissung / Das/ so vnnnd wann
Ewere

and/
id vñ
utter-
egien
e der
d zu-
ainen
zube-
uuer-
vñnd
igen/
det ir
Maie.
(mit
ssen/
d be-
taten
ichen
te ge-
tigen
illet/
rung
refer
d alle
difer
vann
were

Erwere Liebden hierzu verhelffen / alle andere be-
schwärden/so inn disen Landen eingerissen sind/mit
gutem gemainem rath / nach altem herkommen/
leichtlichen widerumb abgelegt finden werden/Wie
wir dann als getrewe Nachbaur und Mitbräder/
von rechts vñnd aller billigkeit wegen / zu befürde-
rung des gemainen nukes/ehr vñnd dienst der Kū-
niglichen Maie. in allen billichen vñnd redlichen sa-
chen/vns zusammen halten sollen.

Vnd werdet ir im grund vñnd mit der warheit
befinden/das es alles falsche vñnd erdichte lüginnen
sind/die vns vnser gemaine Feind (vns von euch/
vñnd euch von vns dardurch abzusondern) zulegen/
als weren wir wie Rebellen von dem gehorsam der
Königlichen Maie. vñnd auch von dem Christlichen
glauben abgewichen.

Dann wir haben nie nichts anders (als vnser
wissentliche Freyheit/vñnd Landrecht/die vns vnser
Künig gegen allen frembden Tyrannen zuhandha-
ben geschworen hat/vñnd wie die von vnsern Vorfä-
ren auff vns kommen sind / vñnd dann vnser gewis-
sen nach Gottes beuelch zu Regulieren) gesucht/
Vnser vertrauen auff Gott vñnd seinen Son Je-
sum Christum stellende / vñnd ihme nach vnserm
schwachen vermögen zudienen vns befleissende/
Gegen der Oberkeit in aller Reuerentz vñnd Ehrer-
bietung

bietung/nach dem beuelch Gottes / vns verhalten-
de/der selbigen allen schuldigen gehorsam leistende/
vnd vnserm nechsten in allem das vns möglich ist/
dienende/Welches jr auch selber (wie wir vns dann
gegen euch genugsam versehen) bekennen werd/ vnd
wann man die sachen mit der warheit examinieren/
wird man sagen vnd vrthailen müssen/das wir wi-
der alle falsche beschuldigung / bey vnpartenschen
Richtern gehört vnd bestehen werden mögen. Vnd
würde fürwar wider die natur vñ alle eigenschafft
deren von Holland sein / das / da sie sich vergriffen
vnd mißhandlet hetten / jr missethat nit bekennen/
vnd daruon inn aller vnterthenigkeit gnad begeren
soltten wöllene Dann man hat vns nie also obstinat
oder hartnäckig in vnserm fürnemen oder fürbrin-
gen/erfaren noch befunden/ sondern in allen sachen
darinnen wir der Königlichen Maie. haben finden
willfaren/vns leichtlichen haben bereden lassen.

Was Nation oder Prouinz ist auch ie gewesen/
die in allen irer Maie. begeren/ vnd hilffen / gutwil-
liger gewesen ist / dann eben wir die von Holland / ja
vns offtermalen so gar milt vñnd gutwillig erzaigt
vnd verhalten/das wir bey den andern Prouincien
mit vnserm gutwilligen Exempel/vnwillen verdie-
net haben. Welche Vnterthonen haben auch inn
allen vergangnen Kriegen (irem Stand nach) mehr
trewe

trewe erzäigt / dann wir die Hollender / wie dann
euch vnnnd meniglich wol bewist ist / Also das wir /
mit der warheit kainer vngheorsamen / Rebellion /
oder vntrewe beschuldigt finden oder möge werden.

Ben dem Horkogen von Alba aber / vnd seinem
Blutrath / werden alle ordnungen der Iusticia umb-
gekeret / alle Oberkeiten / Richter / Amptsleut / vnnnd
Rathsherren verachtet vnd verschmehet / vnnnd alle
sachen nach irem mutwillen gehandelt / dessen sich
auch die guthertzige vnd fromme zum offtermaln be-
klagt / vnd solchen jammer hertzlich vnd inniglich be-
wainet haben.

Hierauff vnnnd derowegen / ermanen
wir euch schließlic / liebe Herrn vnnnd Mitbrüder /
Dz ir ja die sachen mit allem vnd gankem ernst erwe-
gen / alle klainmütigkeit vnd Weibische schwachheit
von euch werffen / einen Mannlichen mutt an euch
nemen / vnnnd mit ewern Mitbrüdern / vnd eigenem
flaisch vnd blutt / die hand anlegen wöllend / damit
onser armes vntergedrucktes Vatterland / einmal
von diesem frembden **E Z X A N N E N** erlöset
vnd entlediget werde / seinem alten rechten herkom-
men vnnnd freiheden nach / vndter den gehorsam der
Königlichen May. vnsers Genedigsten Herrn / vnd
den gewünschten frieden / ruhe / vnd einigkeit / vnnnd
in jr

In ir alte blü vnd wolffart / gebracht möge werden.

Darzu zweifeln wir nicht / das Gott der Herr
euch vnd vns allen / sein almechtige hilff / vnd hand-
reichung / zu mehrung seines Reichs vnd Glorj/
verleihen vnd mittheilen werde.

Gott vnser Herr neme euch in seinen Heiligen
Schutz / Geschrieben zu Delft den 12. Septem-
bris / Anno 1573.

Unterscrieben

Ewere gutwillige Freund vnd
NittBrüder / die Ritter-
schafft / Edlen / vnd Stende
von Holland / von wege der
Stende desselben Lands.

Auff dem 85. Psalm.

Als das ich hören solt / das Gott der HERR redet / Das er
Friede zusagte seinem Volck vnd seinen Heiligen / Auff das sie nit
auff eine torheit geraten. Doch ist ja seine hilff nahe / denen / die
in fürchten / Das in vnserm Lande ehre wone. Das Güt vnd
Gerechtigkeit vnd Friede sich küssen / 2c.

werden.
er Herr
d hand-
Glory/

heiligen
Septem-

ind vnd
Kitter-
Stende
ege der
nds.

r / Das er
das sie nit
denen/ die
häre vnn
ffen/2c.